

07082021 GA Dät Seelterfräiske lait foar ju Huusdore

Dät Seelterfräiske lait foar ju Huusdore

SATERFRIESISCH Ju Toukumst is moorsproakich!

VON WOLTER JETTEN

Knu is n Fründ fon mie Babe wuden. Hie boalt Aastfräisk Plat mäd sin Wäänt. „Es ist ja wichtig das Kinder vorrangig gutes Hochdeutsch sprechen!“ kwaan n Sibbe tou him. Foar do maaste oolde Ljude is ju düütske Sproake noch altied ju wichtichste Sproake. Jo sunt apwuuxen in n Tied, wier ju hoochdüütske Skrieuwtoal ju eentsichste Skrieuwtoal waas. Disse Tied rakt et nit moor.

Nu fljoge wie mäd n Flieger foar 100 Euro ätter Spanien wai. Moor un moor Ljude oarbaidje in't Uutlound un do junge Ljude moakje jadden n Auslandssemester. Die Hondel wädtruch ju Europäiske Union bloot noch internationaaler. In disse globalisierende

Wareld spilt ju ängelske Sproake ne grattere Rulle as ju düütske Sproake.

Deeruum fiende iek ju Moorsproakegaid so wichtich un deeruum boalt min alwenjierigen Suun fjauer Toalen. Do grote Ljude fräigje gerägeld of dät nit tou fuul is. Naja, iek bän so apwuuxen un hie uk, un... wie lieuwje noch!

Deeruum is't komisk dät in't Seelterlound nit aal do Skoulen moorsproakich sunt. Seelterfräisk konnen do Baidene fluks mäd do Noabere of mäd ju Familie äiwje. Wäl Seelterfräisk un Düütsk kon, kon uk eenfacher ne twäide of trädde Sproake deertou lere. Moorsproakegaid kon uk moor Dele fon ju Bräienge aktivierje; deertruch konnen moorsproakige Baidene tou Biespil beter abs-

trakt toanke. Moorsproakegaid häd uk n gouden Ienfloud appe Bräienge wan dät uum Demenz of Alzheimer gungt.

Fröier toachten do Koastere dät two of moor Toalen gefoarelk wieren inne Äntwickelenge fon litje Baidene. Nu wiete wie beter. Moorsproakegaid häd äigentlielik bloot noch Foardele.

Also, wieruum sunt noch nit aal do Skoulen fon't Seelterlound moorsproakich? Dät Seelterfräiske lait foar ju Huusdore! In wäkke Realität lieuwje disse Skoulen?

Uus Baidene mouten in ju globalisierende Wareld daach goud tougjuchte kume?! Moorsproakegaid häd daach bloot Foardele?! Ju Toukumst is moorsproakich!